

Zeitschrift: Annalas da la Societad Retorumantscha

Herausgeber: Societad Retorumantscha

Band: 71 (1958)

Nachruf: Dr. iur. Gion Ruduolf Mohr : 1885-1956

Autor: Schorta, Andrea

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 23.08.2025

ETH-Bibliothek Zürich, E-Periodica, <https://www.e-periodica.ch>

Dr. iur. Gion Ruduolf Mohr

1885—1956

dad Andrea Schorta

Per üna biografia extaisa e profuonda da sar Gion Ruduolf Mohr da Susch, nat ils 18 avrigl 1885 a Zernez e mort ils 12 favrer 1956 a Cuoira, nun ais amo gnü il dret mumaint. Pür vis d'üna distanza chi metta mincha detagl in sia güsta proporziun cul retrat inter, survgnirà la persunalità da quaist remarchabel Engiadinalis seis dret profil. Nossas pacas lingias vulessan be esser ün act da pia algor-danza per ün cumpatriot ed ami.

Cur cha Gion Ruduolf Mohr cumanzet seis viadi tras quaist muond, Zernez, ch'el in prüvadas discussiuns nomnaiva «nos Zernez», s'avaiva malapaina adozà our da la tschendra dal schnuaivel fö dals 5 settember 1872. Tanter las spaziussas chasas nouvas giaschaivan amo qua e là sulams cun lur müraglias e vouts, sulams aint ils quals uffants giovantats sentivan amo la sgrischur dal terribel incendi. L'«an dal fö» ed il prüvà temp «avant il fö» han occupà eir a sar Gion Ruduolf fin a seis ultims dis. El savaiva da quintar detagls da las sgrischusas scenas dvantadas la saira e la not dals 5 settember, detagls uschè vivs e plastics, sco sch'el ils avess gnü vis cun agens ögls.

Premurus genituors ed ün barba, Giachen Delnon, chi promovaiva il svilup dal mat intelligaint dand adüna tröf a tuot sias tschient e milli dumandas, al han garanti üna sulagliva infanzia. I nun ais perque da's far da strani scha'l's set ans ch'el passantet alura a Cuoira sco gimnasiast sun stats a medem temp ans d'increschantüna per seis Zernez, sia glieud, seis prümaran vi sül Plan Schivo.

Duos persunalitats da Zernez han gnü part decisiva vi da la fuormaziun intellectuala e da sentimaint dal giuven: ravarenda Otto Guidon, il predichant ed oratur da rara grandezza, e güdisch federal Andrea Bezzola. Fin a sa mort sar Gion Ruduolf conservet il quadern

da tschairada naira aint il qual el avaiva notà cun bel man l'intera instrucziun da confirmands; fin a seis ultims dis eir' el in cas da repeter inters tocs da predgias, discuors festals o eir be sentenzas occa-siunalas dal ravarenda Guidon. Il güdisch federal Andrea Bezzola avaiv' el bainschi cugnuschü da mattet, l'importanza da quaist poet, schurnalist e politiker mort dal 1897 imprendet el però a stimar pür da scolar chantunal a Cuoir, ingio cha'l giuvnot ha scuvert pass a pass las bellezzas da l'art poetica, las chafuolezzas da las scienzas moralas in general, ma eir l'importanza dal geni dad Andrea Bezzola in special. Diversas da sias poesias al sun stattas cuffort in dis d'in-creschantüna e da paina.

Perche cha Gion Ruduolf Mohr as decidet pel stüdi da la giuris-prudenza nu m'ais gnuü dal tuot cler. Fat aise ch'el sco student a Freiburg, München e Berna eira ün paschiunà ami da l'art, ch'el as spargnaiva ils raps giò da la bocca per s'acquistar üna modesta plazza al teater, al concert, o per pudair frequentar qualche exposiziun. La lectura dals grands rapresentants da la litteratura tudais-cha l'eira recreaziun e vair bsögn da sentimaint. Grazcha a sia memoria incum-parabla as imprimava in seis tscharvè pleds ed impissamaints uschè fich, ch'el davo ans savaiva da'ls reproduér. Ma el avaiva ün fin sensori eir per la valur dals poets contemporans. Gerhard Hauptmann eira ün da seis scriptuors predilets. Seis drama «Die Weber» chi tratta davart il problem social chi pür massa ais dvantà in part la cuolpa da la misigeria politica da noss dis, nu restet sainz' influenza sün seis pensar pel bainstar da la povra glieud.

Davo fini seis stüdis e davo ün cuort temp da giarsunadi e pratica in ün büro d'advocatura a Cuoir s'installat il giuven advocat l'an 1913 a San Murezzan sco associà dals frars Constant e Domenic Bezzola ed appartgnat al büro Bezzola e Mohr fin l'an 1919. Qua vezzet el il lö da cura da renomina internaziunala sül zenit da seis svilup; qua füt el eir perdütta da la catastrofa economica chi culpit l'hote-laria e tuot que chi staiva in relaziun cun ella in consequenza da la prüma guerra mundiala. La comunità da San Murezzan scuvrit bain spert las qualitats dal giuven jurist e'l tschernit in seis cussagl cumü-nal ed aint illa suprastanza da la Società da cura e da trafic. Sco cunredactur da l'«Engadiner Post» nun avet el be chaschun dad ex-primer cuntuadamaing sias ideas regard a l'andamaint ed a l'ad-ministraziun dals affärs publics, ma bainschi da metter in discussiun

eir dumandas da portada chantunala, federala ed internaziunala. Las reminiscenzas «Erinnerungen an meine St. Moritzer Jahre 1913—1919» cha G. R. Mohr dictet amo pacs mais ant sia mort per l'«Engadiner Post» e chi cumparittan eir sco plaschaivla broschüretta and dan ün impreschiunant retrat.

L'an 1919 gnit Mohr clamà a Cuoir sco redactur dal «Freier Rätier» illa piazza da redactur Hans Jeger. Insembel cun sia consorta, duonna Tilla nata Töndury, cun la quala el eira uni daspö il 1915 in furtünada lai, e cun seis uffants bandunet el l'Engiadina e restet alura al timun da la gazetta quotidiana liberala fin l'an 1935. El eira redactur respunsabel per la part grischuna e staiva sco tal in stret contact cun ün ampel numer da correspondents in tuot las vals. Que al staiva però a cour d'exprimer eir seis agen avis in dumandas culturalas e politicas, e seis artichels gnivan stimats tant causa lur stil elegant ed original co pervia da las ideas ch'el defendaiva.

Ils 24 november 1935 ils votants da Cuoir tschernittan a dr. Gion Ruduolf Mohr sco president da cità. Ils temps eiran noschs. Una crisa economica avaiva sdarlossà la fundamainta da grands e pussants stadis e chaschunaiva depressiuns e dischoccupaziun eir in Svizzera. Il faschissem talian e'l nazissem tudais-ch marchaivan cun frantur incunter a la guerra. La depressiun as faiva valair dapertuot. Ünguotta nu pudaiva incuraschar al redactur d'ün fögl quotidian da's metter al timun d'ün' administraziun sco quella da cità, scha na il sentimaint da dovair e responsabilità. Titels sco «imposta pel sustegn als dischoccupats», «controlla dals predschs», «cumischiun da mobilisaziun» chi cumparan aint il rapport annual da l'administraziun da cità da l'an 1936 (dasper problems da finanziaziun da l'Ospidal chantunal, dal provedimaint d'aua, correcziun e fabrica da vias, piazza da sport etc.) indicheschan fingià cleramaing che cuors cha'l muond pigliaiva. La tensiun va augmantand fin al 1939 cun seis pissers da raziunamaint, defaisa da l'ajer passiva, mobilisaziun, economia da guerra. Mohr s'acquista grands merits cun sias masüras socialas; la cità cumpra fingià l'an 1940 provisiuns da mangiativas in ün import da 70 000 francs. Ils dovairs dal preschaint però nun al laschan schmanchar da's preparar per tuot las eventualitats da l'avegnir, da sgürar a la cità in tuot seis aspets ün svilup armonic e san. La fabrica da l'Ospidal chantunal, renovaziun dal «Werkhof», da la chasa da tregants al Rossboden, da la chasa da scoula Daleu etc. que sun

las ouvras chi creschan ad ögl vezzand. L'inauguraziun da la veglia «sala da cussagl» chi gnit renovada in möd uschè cumpetent, la restauraziun dals vouts da la chasa da cità (Rathaus) chi hoz dan tet a la faira da verdüra, que sun duos cas da blers chi muossan cha'l natüral artistic da G. R. Mohr nu succombet aint il curdombel da l'administraziun, da las correspundenzas, audienzas e tschantadas. Ma'l pais da grandas incumbenzas sco quella da la construcziun dal terz s-chalin da l'impraisa electrica da la Plessur, ouvra chi cuostet la bagatella dad 8 milliuns e mez, l'organisaziun da la Festa federala da tir, nouvs progets sainza fin, que tuot cumainza a consümar las forzas dal president chi fin l'an 1947 sta sün seis post sulet, sainza ün secretari persunal. Tuottiüna G. R. Mohr as sainta amo ferm avuonda per star inavant a disposiziun da la cità sco president e sco deputà al Grand Cussagl da nos chantun Grischun, al qual el fet part da l'an 1935 fin al 1951. L'an 1944 avet el l'onur dad esser seis president.

Il dun d'oratur, dun uschè nöbel ed uschè rar, cha'l giuven Mohr avaiva admirà vi da seis magister, ravarenda Otto Guidon a Zernez, eira dat eir ad el. Ma el il cultivaiva eir instancabelmaing; sia biblioteca richa da belletristica, dad algords e biografias da grands homens cuntgnaiva eir bainquantas ouvras davart la retorica. El las avaiva stübgiadas. Ma mai ch'el avess tut il pled be per brigliar ün mumaint ed inchaschar ün applaus bunmarchà. Be zuond d'inrar ch'el ha improvisà ün discuors public as laschand surprender dal mumaint. Scha sia vocaziun da redactur, da deputà al Grand Cussagl, da president da cità e da cussglier naziunal o eir be l'atmosfera cordiala i'l rauogl da chars amis al obliaiva da tour il pled, schi plü suvent co brich as rechattaiva in üna gigliooffa dal tschop da sar Gion Ruduolf ün bigliet cun ün pêr puonchs essenzials, ün pêr datas (scha bsögn faiva) ed eir qua o là üna formulaziun chi al paraiva adattada al mumaint. Confessand quaist seis bsögn dad esser preparà ans asgüret el üna jada vers la fin da seis dis, ch'el haja salvà bleras e bleras voutas seis palperis in gigliooffa sainza tour il pled.

L'amur per l'art, pustüt per la poesia mai nu chalet tar el. Eir dûrant ils ans dal plü grand travasch avaiv' el mantgnü la regla da leger scha pussibel mincha saira «almain üna mezz' uretta» varsquantas paginas d'ün autur predilet, ün chapitel da qualche ouvra autobiografica e biografica. Quaist cuntin contact cun spiert, art e cultura l'inrichit in möd admirabel e fuormet seis sen artistic ed isto-

ric, uschè ch'el pudaiva servir cun ün bun cussagl eir a noss scriptuors rumantschs chi as laschaivan cussglier dad el. Que chi fluit da sia aigna penna ha el dat a sias gazettas, il prüm a l'«Engadiner Post», alura al Rätier, al Fögl ed a la *Gazetta Ladina*. Dad esser svess litterat o poet nu s'ha el mai insömgia.

Il quader da l'operusità da G. R. Mohr füss manglus schi nu's fess manzun da seis merits sco Rumantsch. El as laschet eleger fingià dal 1920 aint illa suprastanza da la Lia rumantscha e füt fin dal 1945 seis viceparsura, ün fidel e discret collavuratur dal president Giachen Conrad. Infarinà in tuot ils problems dal mantegnimaint e da la cultivaziun da nos linguach matern füt el alura il defensur ideal dals postulats da la LR aint il Cussagl naziunal. Nossa Lia avaiva preschantà l'an 1947 ün' instanza al Cussagl federal dumandand ün augmaint da la subvenziun sün 70 000 francs. In vista a las difficultats chi naschivan a la Confederaziun causa l'uorden da finanzas il Cussagl federal nun as pudet decider da correspuonder interamaing al giavüsch da la LR, ma proponiva a las chambras ün agüd da 20 000 francs. Tant la Cumischiun da Finanzas co'l Cussagl dals Stadis avaiva fingià acconsenti unanimamaing a la proposta dal Cussagl federal. Adonta da quaista situaziun pac favuraivla e malgrà cha vegls e versats members dal parlament al scussaglian, ris-cha Mohr da defender l'instanza da la LR illa tschantada dals 10 dec. 1947.

La chosa cha Mohr sustgnaiva eira buna. Decisiv ais però stat il möd co ch'ella gnit defaisa. Al pled bain ponderà, degn ed amiaivel in sia fuorma, ma schlass in seis fundamaint il Cussagl naziunal nu pudet resister. Cun 87 cunter 47 vuschs decidet el da conceder a la LR üna subvenziun annuala da 50 000 francs. Quaista decisiun avet per conseguenza üna reponderaziun dal cas aint il Cussagl da Stadis e finalmaing ün allegraivel success per la Lia rumantscha e per seis defensur, cussglier naziunal dr. Mohr. Il respet e credit ch'el s'avaiva acquistà tras quaista victoria il predestinaiva per portaparola in oters affärs grischuns a Berna. La sort nun al concedit però quetant.

L'an 1950 gnit el culpi da greiva malatia chi'l büttet per ans i'l let da düras suffrentschas. L'hom da 65 ans chi per üna lunga perioda da sia vita nun avaiva vuglü as schaniar, sentit dandettamaing quant inavant cha sias forzas corporalas eiran consümadas. Ma seis spiert alert, seis optimissem e bun umur al güdaivan adüna darcheu suravi las plü greivas uras. Seis amis nu mancaivan da'l visitar il

prüm a l'ospidal, davo in chasa. Per blers d'els as revelet pür in quaists ans la natüra ed il caracter da quaist Engiadinais in sia intera grandezza. Els chi suvent gnivan per il consolar, as sentivan consolats dad el in lur agens fastidis. Sias blerischmas chartas il prüm scrittas cun man tremblant, davo dictadas a sia pisserusa duonna giaivan da preferenza tar qualchün chi eira svess sofferent. Uschè que ch'el avaiva retschevü in sia vita uschè bundantamaing, amicizcha e fideltà, que rendet el in quaists ultims ans dubla- e triplamaing.

Per la celebraziun funebra chi avet lö ils 15 favrer aint illa baselia da San Martin a Cuoira as radunet üna granda raspada gönüda nanpro da tuottas varts. In ün di da bischa e dschiervezza la terra dal sunteri giò Daleu as lovet sün seis vaschè.